

Aber das grüß oder sandt auß flüssigen steinen gemacht / sollen zwey teil mit nitrat oder bergsalz / oder auß einem gesalzenē kraut gemacht / zügleich vermischet werden / zü welchen ein klein stüctlin Magnets zügesetzt soll werden: fürwar diese sonderliche tugend / wirt auch zü vnserē zeittē / gleich so wol als vor altē geglaubt / dz er also in sich dē safft des glasses ziehe / wie er das eisen an sich ziehet / vñ dasselbig reinige / vnd vom grünen oder gälten weiß mache / den Magneten aber verzert darnach das eisen: die aber der jezgenandren säfften keine haben / die selbigē / durchmischendt zwey teil der Eichen oder Cirmenbeumen äschē / oder so diese nicht vorhanden / der Büchenen oder Fichtenen / mit einem teil des grüßes oder sandts / vnd thündt darzū ein wenig saltz auß gsaltzen wasser oder mehrwasser gemacht / vñ ein kleins stüctlin Magnets: aber diese machēdt nicht so ein weiß vñ durchsichtiges glas. Die äschen aber wirt auß alten beumen gemacht / welcher stock / so er sechs werckschüh in die höhe gewachsen / ist außgehauwē vñnd feur darin geworffen / der ganz baum verbrenndt / vnd zü äschen gebracht wirt / welchs im winter geschicht / so der schnee lang liget / oder im Sommer / so es nicht regnet: dan die plazregen / zü anderen zeitten des jars / daß sie die äschen mitt der erden vermischendt / machendt sie die selbigen vn sauber. Derhalbē soll als dan eben auß disen beumen / in viel stüct zerhauwē / vnd vnder dem rath verbrenndt / die äschē gemacht werdē. Aber dē anderē glas machern seindt drey öfen / den anderen zwen / den anderen einer: denen aber drey / die selbigē schmelzē erst mal die matery im schmelzofen / in dem glas ofen schmelzen sie die selbigen widerumb / in den külofen külendt sie die glesene genhäß vñnd andere glühende arbeit: deren schmelzofen sol gwelbt / vñnd einem bachofen gleich sein / in welchs oberen gewelb / das sechs werckschüh lang / vier breit / vñnd zwen hoch ist / sollen die vermischte ding mitt ein hefftigen feur so lang geschmelzet werden / bis sie fließendt / vñnd zü glas werden / wiewol noch nicht genügsamlich von gallen gseuberet / diese so küll worden / sollen herauß gezogen der vñnd in stüct zer teilet werden / auch in dem selbigen ofen / sollen töpffen die das glas halten / gewermbt werden.

Des schmelzofens vnder gewelb A. Das
ober gewelb B. Das stüct glas C.

Der